



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

ODLUKA
O USLOVIMA I POSTUPKU PRIHVATANJA POKROVITELJSTVA
GRADA SARAJEVA
(Prijedlog)

Predlagač: Gradonačelnica

Obrađivač: Stručna služba za poslove kabineta
i poslove Gradske uprave

Sarajevo, februar 2024. godine

Adresa: Hamdije Kreševljakovića 3
71 000 Sarajevo
Tel.: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 31. stav (1) tačka b) Statuta Grada Sarajeva („Službene novine Kantona Sarajevo”, broj 7/23), Gradsko vijeće Grada Sarajeva, na __. sjednici održanoj dana __. __. 2024. godine, donijelo je:

(Prijedlog)

**ODLUKU
O USLOVIMA I POSTUPKU PRIHVATANJA POKROVITELJSTVA
GRADA SARAJEVA**

Član 1.

(Predmet Odluke)

Ovom odlukom uređuju se uslovi, postupak i način prihvatanja pokroviteljstva Grada Sarajeva (u daljnjem tekstu: pokroviteljstvo), nad društvenim, naučnim, kulturnim, sportskim ili drugim manifestacijama, priredbama, skupovima i drugim projektima od značaja za grad Sarajevo, kao oblika promoviranja njegovih interesa, čiji su organizatori pravna lica.

Član 2.

(Vrste pokroviteljstva i nadležnost za odlučivanje)

- (1) Pokroviteljstvo je način na koji se Grad Sarajevo povezuje sa odabranim brojem događaja koja ispunjavaju uslove potrebne kako bi se među građanima, u medijima i civilnom društvu povećao interes javnosti za aktivnosti organizatora događanja i aktivnosti Grada Sarajeva te kako bi se povećala vidljivost tih aktivnosti.
- (2) Grad Sarajevo može prihvatiti počasno pokroviteljstvo, kao i pokroviteljstvo finansijske prirode.
- (3) Gradonačelnik/ca Grada Sarajeva (u daljnjem tekstu: gradonačelnik/ca) donosi odluke, odnosno zaključuje ugovore o prihvatanju počasnog pokroviteljstva.
- (4) Gradonačelnik/ca Grada Sarajeva donosi odluke, odnosno zaključuje ugovore o prihvatanju pokroviteljstva uz finansijske obaveze Grada Sarajeva do 20.000,00 KM.
- (5) Gradsko vijeće Grada Sarajeva (u daljnjem tekstu: Gradsko vijeće) donosi odluke o prihvatanju pokroviteljstva uz finansijske obaveze Grada Sarajeva u iznosima većim od 20.000,00 KM.

Član 3.

(Podnošenje prijedloga, odnosno inicijative)

- (1) Prijedlog, odnosno inicijativu za prihvatanje Pokroviteljstva iz člana 2. ove odluke mogu podnijeti pravna lica koja nisu registrovana za ostvarivanje profita (udruženja, fondacije, i sl.) – organizatori društvenih, naučnih, kulturnih, sportskih ili drugih manifestacija, priredbi, skupova i drugih projekata koja su od značaja za Grad Sarajevo.
- (2) Prijedlog, odnosno inicijativa iz stava (1) ovog člana dostavlja se gradonačelniku/ci, putem nadležne službe Gradske uprave Grada Sarajeva (u daljnjem tekstu: Služba), u pisanoj formi, sa svim potrebnim podacima o podnosiocu prijedloga, odnosno inicijative, te podacima o događaju (priredbi, manifestaciji) ili projektu za koji se podnosi prijedlog, odnosno inicijativa, uz kompletnu dokumentaciju koju gradonačelnik/ca dostavlja Službi na daljnji postupak.

Član 4.

(Postupak odlučivanja)

- (1) Podneseni prijedlog, odnosno inicijativu, iz člana 3. ove odluke, sa svim potrebnim podacima o podnosiocu prijedloga, odnosno inicijative, te podacima o događaju (priredbi, manifestaciji) ili projektu za koji se podnosi prijedlog, odnosno inicijativa, obrazloženu i sa kompletnom dokumentacijom neophodnom za odlučivanje, nadležna Služba dostavlja Komisiji za prihvatanje pokroviteljstva koju gradonačelnik/ca imenuje posebnim rješenjem.
- (2) Komisija iz stava (1) ovog člana Odluke procjenjuje opravdanost podnesenog prijedloga, odnosno inicijative, prvenstveno sa stanovišta značaja za Grad Sarajevo, odnosno sa stanovišta promoviranja njegovih interesa, a sve u skladu sa Pravilnikom o kriterijima za prihvatanje pokroviteljstva iz člana 1. Odluke (u daljnjem tekstu: Pravilnik) koji donosi gradonačelnik/ca Grada Sarajeva.
- (3) Prijedlog, odnosno inicijativu, sa svojim stavovima i mišljenjima, Komisija upućuje gradonačelniku/ci Grada Sarajeva na razmatranje i konačno odlučivanje, u slučajevima propisanim u članu 2. stav (3) ove odluke.
- (4) U slučajevima propisanim u članu 2. stav (4) ove odluke, prijedlog, odnosno inicijativu, gradonačelnik/ca Grada Sarajeva, kao predlagač, dostavlja Gradskom vijeću Grada Sarajeva na razmatranje i konačno odlučivanje.

Član 5.

(Obavještajne podnosioca prijedloga, odnosno inicijative)

O konačnoj odluci Gradskog vijeća, odnosno gradonačelnika/ce, Služba obavještava podnosioca prijedloga, odnosno inicijative.

Član 6.

(Praćenje realizacije i obezbjeđivanje sredstava)

- (1) O realizaciji ugovora i odluka iz člana 2. ove odluke, brine gradonačelnik/ca, putem nadležnih službi Gradske uprave Grada Sarajeva i o tome redovno izvještava Gradsko vijeće.
- (2) Sredstva za realizaciju pokroviteljstva finansijske prirode obezbjeđuju se u Budžetu Grada Sarajeva.

Član 7.

(Obaveze organizatora pokroviteljstva)

- (1) Ukoliko Grad Sarajevo prihvati pokroviteljstvo, organizator je obavezan tokom trajanja događaja istaknuti naziv i vizuelni identitet Grada Sarajeva kao pokrovitelja.
- (2) Prihvatanjem pokroviteljstva, Grad Sarajevo ne preuzima organizacijske obaveze.

Član 8.

(Donošenje Pravilnika)

Gradonačelnik/ca je dužan/na, u roku od 30 dana od dana stupanja na snagu ove odluke, donijeti Pravilnik iz člana 4. stav (2) Odluke.

Član 9.

(Postupak izmjena i dopuna)

Izmjene i dopune Odluke vrše se na način i po postupku za njeno donošenje.

Član 11.

(Prestanak važenja)

Stupanjem na snagu ove odluke prestaje da važi Odluka o uslovima i postupku prihvatanja pokroviteljstva Grada Sarajeva („Službene novine Kantona Sarajevo“, broj 05/06).

Član 12.

(Stupanje na snagu)

Odluka stupa na snagu narednog dana od dana objavljivanja u „Službenim novinama Kantona Sarajevo“.

PREDSJEDAVAJUĆI GRADSKOG VIJEĆA

Jasmin Ademović

Broj:

Sarajevo, __. __. 2024. godine

OBRAZLOŽENJE

PRAVNI OSNOV

Pravni osnov za donošenje Odluke sadržan je u članu 31. stav (1) tačka b) Statuta Grada Sarajeva Statuta Grada Sarajeva kojim je propisano da Gradsko vijeće Grada Sarajeva donosi odluke, druge propise i opće akte i daje njihovo tumačenje.

RAZLOZI DONOŠENJA

Gradsko vijeće Grada Sarajeva, na sjednici održanoj dana 31. januara 2006. godine, donijelo je Odluku o uslovima i postupku prihvatanja pokroviteljstva Grada Sarajeva („Službene novine Kantona Sarajevo“, broj 5/06). Odlukom o uslovima i postupku prihvatanja pokroviteljstva Grada Sarajeva uređeni su uslovi, postupak i način prihvatanja pokroviteljstva Grada Sarajeva nad društvenim, naučnim, kulturnim, sportskim i drugim manifestacijama, priredbama i skupovima od značaja za Grad Sarajevo. U članu 2. naprijed navedene Odluke definirano je da gradonačelnik/ca donosi odluke o prihvatanju pokroviteljstva uz finansijske obaveze Grada Sarajeva do 25.000,00 KM, kao i da Gradsko vijeće donosi odluke o prihvatanju pokroviteljstva uz finansijske obaveze Grada Sarajeva u iznosima većim od 25.000,00 KM. Prijedlogom Odluke koji je upućen Gradskom vijeću na razmatranje i odlučivanje korigovani su navedeni iznosi, te će ubuduće odluku o prihvatanju pokroviteljstva uz finansijske obaveze Grada Sarajeva do 20.000,00 KM donositi gradonačelnik/ca, dok će o iznosu pokroviteljstva iznad 20.000,00 KM odlučivati Gradsko vijeće.

Prethodna Odluka je korigovana i u dijelu koji se odnosi na postupak procjene opravdanosti podnesenog prijedloga, odnosno inicijative, te će ubuduće podneseni zahtjev cijeliti Komisija za prihvatanje pokroviteljstva, na prijedlog nadležne Službe, a sve u skladu sa Pravilnikom o kriterijima za prihvatanje pokroviteljstva koji donosi gradonačelnik/ca.

Obzirom da su u Budžetu Grada Sarajeva za 2024. godinu („Službene novine Kantona Sarajevo“, broj 55/23), sredstva za primjenu Odluke o uslovima i postupku prihvatanja pokroviteljstva Grada Sarajeva predviđena za realizaciju na poziciji 614300: Tekući transferi neprofitnim organizacijama: Primjena Odluke o uslovima i postupku prihvatanja pokroviteljstva Grada Sarajeva, u okviru Stručne službe za poslove kabineta i Gradske uprave, te da su pojedine procedure jasnije definirane i precizirane, to se i pristupilo sačinjavanju prijedloga predmetnog akta.

Uvažavajući naprijed navedeno, Prijedlog Odluke o uslovima i postupku prihvatanja pokroviteljstva Grada Sarajeva dostavlja se Gradskom vijeću Grada Sarajeva na razmatranje i odlučivanje.

FINANSIJSKA SREDSTVA

Za realizaciju ove odluke obezbjeđena su sredstva u Budžetu Grada Sarajeva.